

2 TIMOTI

Pepa Paulo ingere muli pa Timoti

Paulo imo luma sakamao ilo lâ Rom lawea ŋana ne wurâta ŋana itula pâri ara kâ, aku isama tu i ne zo ŋana imâte kâ nde imâ ipânga laiti lâ (4:6-8). Mine kala ingere pepa tonje kilo pa ninambwe Timoti ŋana ipu tini kaika papa. Ipai Timoti tu kinda ma takai malia wa nâna kie-kie ŋana nenda kalo-tawana kâ, aku kiesaka ma ipânga ŋalae lâ tâno kulu; andeta ara ŋana kinda ma tamandi kaika ku kalonda tawana Maro ŋalae. Yesu Kiriŋi ipole mateŋa marumbu lâ, aku kinda ma tamo ara kuku i lâ samba lawea. Paulo itula vetâŋa ara pinde pa Timoti ŋana ipaveta kuku.

1 ¹Naŋa Paulo, naŋa amo Yesu Kiriŋi ne pâri-tamâta ikura Maro Kindeni tamwata ne pateâŋa mine. Ipatea naŋa tu atula ŋgua ŋana via ŋinde i muŋga ipambwâre tu ma ilanzi tamâta ea kalonzi tawana Yesu Kiriŋi. ²Timoti, noko kutogo naŋa natuŋgu mao mine. Naŋa aŋgere ŋgua lâ pepa ŋine tini imâ pano. Tamânda Maro Kindeni ŋga nenda Maro Yesu Kiriŋi rua nenzi wisi-wisi wa kalo-sukâŋa wa wisi-pisi wa imâ pano.

Kinda ma mainda ŋana pâri ara kâ ndimo

³Kinda timbunda muŋga siveta Maro Kindeni ne wurâtani sonde, kala sipasama tu nenzi soki tonje tia lâ i nao. Aku naŋa kala uru aveta Maro Kindeni ne wurâta lâ vetâŋa kie taituni. Lâ naŋa ilonŋu kalonŋu, naŋa apasama tu nanenŋu soki tonje keno lâ i nao, ande tia. Aku ikura zo rârâni, lâ kari wa mbo wa, lâ zo ŋana akai noŋa kâ, ande naŋa uru kalonŋu ŋgere ŋana noko kâ, aku kawâŋgu ndaŋge pa Maro Kindeni. ⁴Naŋa kalonŋu ŋgere ŋana noko mata sulu ŋinde muŋga indue, aku ilonŋu ŋalae tu amorano kilo. Ambo naŋa ma amorano kilo, ande naŋa ma andeka ndo. ⁵Naŋa asama tu noko kalo tawana Yesu Kiriŋi mao nâ, lâ vetâŋa kie taituni itogo muŋga noko timbu taine Lois aŋga noko tina Yunis kala kalonzi tawana Yesu mine. Mao nâ, noko ne kalo-tawana kala ikeno mine

nâ. ⁶Naŋa kalonŋu ŋgere ŋana noko ne kalo-tawana ŋinde kâ, ande kala atu apaŋo noko ne ilo-kalo, ŋana noko ma kuveta walo ŋinde Maro Kindeni muŋga ilano tu ma ipâŋga ŋalae ndo, itogo tamâta imbana yâa ku iveta mela-mela ŋalae mine. Maro Kindeni walo ŋinde ilano lâ zo ŋinde naŋa ao mbaunŋu kâki lâ noko kulu ku atu nzâmbe pano. ⁷Ŋana tu Maro Kindeni ne Koroani Sapâŋa ilua kindi lâ, aku ŋinde ŋandai koroani ŋana iveta kindi taruru ŋga. Koroani ŋinde nde ŋana ipu tini kaika pa ilonda kalonda. I ŋana iveta tininda mwasa panzi tininda pinde kâ, aku i ŋana igagati ilonda kalonda tu ma tapakatona warakânda nenda vetâŋa sondo.

⁸Mine kala noko ma mai ŋana kutula nenda Maro Ŋalae ne ŋgua pwataki ndimo. Naŋa amo luma sakamao ilo ŋana nanenŋu kalo-tawana kâ, andeta noko ma mai ŋana naŋa kâ ndimo. Ara ŋana noko ma pwai Maro Kindeni ne walo kaika, aku pwale malia ŋana kutula i ne pâri ara kâ, itogo naŋa uru akale malia mine. ⁹Nanayoni, Maro Kindeni iyaute kindi piti lâ kondoma ilo ku ipatea kindi tu tamo i tamwata ne wurâta tamâta. Andeta i ŋandai kalo ŋgere ŋana nenda vetâŋa ara pinde ŋinenŋa ipatea kindi ŋga. Nia ndoyo, lâ zo ŋinde ipulia kekeleke rârâni ipâŋga tia yo, ande i ilo pa kindi ikura i tamwata ne pateâŋa. Aku io ne wisi-wisi lâ Yesu Kirisi mbau ilo imâ pa kindi, ku iveta kindi tamo i ne tamâta mao nâ. ¹⁰Muŋga, nenda Yautâŋa Tamwata Yesu Kirisi imâ ipâŋga lâ tâno kulu. Aku lâ zo ŋinde, Maro Kindeni ne wisi-wisi imâ pa kindi ku ipâŋga nia yo. Pâri ara ikeno mine: Yesu Kirisi ipu mateŋa ne walo ndoni indue lâ, aku itula nzâla pa kindi tamâta rârâni ŋana ma takai via mao ŋana tamo ara mine ku tamo nâ. ¹¹Maro Kindeni ilo tu naŋa ma aveta wurâta papa i. Mine kala ipatea naŋa tu atula pâri ara ŋinde, aku ipateana ŋana apanananzi tamâta ŋana vetâŋa rârâni ŋinde i ilo papa tona. ¹²Aku ŋana nanenŋu wurâta ŋinde kâ, ande naŋa uru akai malia wa nâna ŋine. Andeta naŋa ŋandai maŋgu ŋga. Naŋa asama Yesu Kirisi kilala, kala ao nanenŋu kalo-tawana ilâ papa i. Aku naŋa asama tu i ikura ŋana ikatona kekeleke ŋinde muŋga io lâ mbaunŋu ilo. Aku ŋinde ma ikeno sondo lee, ikura lâ zo ŋalae ŋana Yesu Kirisi ma itaulo imâ kilo kâ.

¹³Noko ma kalo ŋgere sondo ŋana ŋgua wa vetâŋa mao ŋinde muŋga atula pano, aku kuveta vetâŋa kie taituni ŋana kutula ŋgua wa kupanananzi tamâta, itogo naŋa aveta mine. Aku noko ma kupaveta kuku kalo-tawana ne mâsi wa tini-mwasa ne mâsi wa, itogo Yesu Kirisi ne tamâta uru siveta mine. ¹⁴Maro Kindeni io ne pâri ara lâ noko mbalau ilo tu pwatona kâ. Ŋinde nde kekeleke ara ndo, kala noko ma pwatona sondo nâ. Koroani Sapâŋa uru imo kindi kalo-tawana tamâta ilonda. Mine nde ara ŋana noko ma kusâu pa Koroani Sapâŋa ne walo ŋinde tu ma ivilano ŋana pwatona pâri ara ŋinde kâ.

¹⁵Noko kusama tu kalo-tawana tamâta rârâni lâ Esia tâno nde tininzi piti ŋana naŋa kâ. Aku Figelus ku Hermogenes rua kala tininzi piti ŋanana mine nâ.

¹⁶Naŋa ilonŋu tu Maro Ŋjalae ma kalo sukâŋa ŋana Onesiforus tavanzi tamâta ŋinde simo i ne luma. Muŋga, Onesiforus iveta vetâŋa ara ŋana ilulu ilonŋu ikura zo zo. Aku imora tu naŋa amo luma sakamao ilo, aku imora tu kinzi sipa wâlo kaika lâ tiningu tona. Andeta i mai ŋana naŋa kâ, ande tia. ¹⁷I imâ ipâŋga Rom lawea lâ, ŋineŋga walele nâ ikai wurâta ŋalae ndo ŋana iroto ŋana naŋa kâ. Iroto lee, ŋineŋga isânda kulunŋu kilo. ¹⁸Naŋa ilonŋu tu Maro Ŋjalae ne kalo-sukâŋa ma ilâ pa Onesiforus, lâ zo muli ŋinde Maro Kindeni ma ipare nia panzi tamâta ŋana nenzi vetâŋa kâ. Noko kusama tu Onesiforus muŋga iveta vetâŋa rârà kie-kie ŋana ivila naŋa lâ Efesus lawea tona.

**Paulo itu ŋgua pa Timoti tu i ma imo itogo
Yesu Kirisi ne zugu tamâta ara mine**

2 ¹Naŋa natunŋu, Maro Kindeni ne wisi-wisi imo kunzi tamâta ea kalonzi tawana Yesu Kirisi. Mine kala ara ŋana noko ma kusâu pa wisi-wisi ŋinde tu isukano ŋana kumandi kaika ikura zo râràni. ²Aku ŋgua râràni kala noko muŋga kulonŋo naŋa atula lâ tamâta rârà naonzi ŋinde, ande noko ma kutula ŋguani ndaina panzi tamâta arara pinde, kinzi ŋinde uru sipaveta kuku Maro Kindeni ne ŋgua. Ŋineŋga kinzi kala ma sikura ŋana sipanananzi tamâta pinde tona.

³Noko ma kumo kutogo Yesu Kirisi ne zugu tamâta ara mine, aku pwai malia tava nâna itogo maka uru kakai mine. ⁴Noko kusama lâ ŋana zugu tamâta nenzi vetâŋa kâ. Lâ zo ŋana siveta nenzi wurâta, ande kinzi uru siveta wurâta kie tonŋe tava, ande tia. Kinzi uru siveta zugu nâ nenzi wurâta sondo, ŋana nenzi koipu ŋana zugu kâ ma ilonzi ara ŋananzi. ⁵Aŋga tamâta ŋana ipagui paguiŋa kâ, ande i uru ipagui ikura paguiŋa ne tukuŋa nâ. Ambo i ma iveta mine tia, ande i ma ikura tu ikai kulu ŋana ipole paguiŋa kâ, ande tia. ⁶Aŋga tamâta ea ikai wurâta ŋalae ŋana ipau kâpwa lâ tâno ilo, ande tamâta ŋinde ma ikai kâpwa kanaŋo muŋga lâ ŋga. Aku muli, ŋineŋga tamâta pinde ma sikai kanzi tona. ⁷Noko ma kalo ŋgere sondo ŋana nanenŋu ŋgua ŋine kâ. Ambo noko ma kuveta mine, ande Maro Ŋjalae ma iveta noko ne ilo-kalo ipâŋga, ŋana ma kusama ŋgua ŋine râràni ne duvi pwataki.

⁸Ikura zo râràni, noko ma kalo ŋgere ŋana timbunda Daviti ne vâsa Yesu Kirisi kâ, ina muŋga imâte, ŋineŋga imandi sânda imo via kilo. Naŋa uru atula pâri ara mine nâ panzi tamâta. ⁹Tamâta pinde situ naŋa nde tamâta sakamao, ŋana tu naŋa uru atula pâri ara ŋinde panzi tamâta. Mine kala kinzi uru sio malia wa nâna kie-kie imâ pana. Andeta ŋinde nâ tia; kinzi sio naŋa lâ luma sakamao ilo, aku sipa keŋgu lâ wâlo kaika tona, itogo siveta panzi nanzare tamwatanzi mine. Andeta sâ tonŋe ikura tu ipono nzâla ŋana Maro Kindeni kawa ŋgua tulâŋa kâ, ande tia ndo. ¹⁰Mine nde naŋa uru apu tini kaika pa warakâŋgu ilonŋu

kalonju, aku akale malia njine rârâni. Aveta mine njana avilanzi tamâta njinde Maro Kindeni muŋga ipateanzi tu simo i tamwata ne ngu. Naŋa ilonju tu Yesu Kirisi ma iyautenzi piti lâ kondoma ilo tona, kala ma simo ara ndo kuku Yesu ikura zo rârâni ku simo nâ.

¹¹Ŋgua njine nde mao nâ, aku ikura njana kinda kalonda tawana: ambo kinda tamâte kuku Yesu, ande muli ma takai via mao ku tamo kuku i; ¹²ambo kinda takai nâna wa malia wa, aku tamandi kaika nâ, ande muli ma tamo koipu njalaŋala kuku i. Ambo kinda tapu mulinda papa i, ande lâ zo muli i kala ma ipu muli pa kinda. ¹³Ambo kinda tapa njgua tu ma taponu muli papa i, andeta tapile nenda kalo-tawana njinde, ande i ma iveta ikura i tamwata ne njgua pânja nâ, njana tu ikura tu itoto i tamwata kawa njgua njinde utu, ande tia ndo.

**Paulo itu njgua pa Timoti tu ma imo Maro
Kindeni ne wurâta tamâta mao**

¹⁴Ikura zo rârâni, ara njana noko ma kupanananzi tamâta njana njgua njine kâ. Tia ma kalonzi kapa njana. Aku kuporo njgua kaika panzi lâ Maro Kindeni nao tu ma sipawa njana njgua kaa kaa ndimo. Ŋgua kie mine ikura tu isuka tamâta tonje tia ndo. Ambo tamâta tonje uru itambira taŋa pa njgua kaa mine, ande njinde ma iyaula i ne kalo-tawana. ¹⁵Noko ma pwai wurâta kaika tu kumo Maro Kindeni ne wurâta tamâta mao njana kutula i kawa njgua sondu ndo. Ambo noko ma kuveta mine, ande Maro Kindeni ma ilo ara njana noko ne wurâta kâ, aku noko ma mai lâ i nao, ande tia. ¹⁶Noko ma kupu muli pa njgua potomule kie-kie, aku kupono muli pa Maro Kindeni ne ilo-kalo nâ. Ŋgua kie potomule mine uru ionzi tamâta simo malawae ndo njana Maro Kindeni kâ. ¹⁷Tamâta nenzi njgua kie mine nde itogo mbwatakâe sakamao uru ipânja njalae ndo ku iyaulanzi tamâta. Tamâta rua, Himeneus ku Filetus rua, ande uru siporo njgua kie mine. ¹⁸Kinzi rua nde sipile nzâla njana siporo njgua mao kâ. Kinzi rua uru siporo mine: “Mandiŋa lâ mateŋa nianzi ne zo ande nanayoni ipânja marumbu lâ, kala zo muli tamâta tonje ma imandi imo via kilo mine, ande ma tia.” Aku nenzi njgua njine uru iyaula tamâta pinde nenzi kalo-tawana.

¹⁹Andeta Maro Kindeni muŋga iŋgunu njgunu-njgunu tonje panzi tamâta rârâni njinde kalonzi tawana i. Aku njgunu-njgunu njinde nde imandi kaika ndo ku imo nâ. Maro Kindeni muŋga iŋgere njgua lâ njgunu-njgunu njinde tini mine tu, “Maro Ŋjalae isama ne tamâta kilalanzi”. Aku iŋgere njgua tukuŋa tona mine tu, “Ambo noko tamâta tonje uru kupanea Maro Ŋjalae, ande noko ma kupile kiesaka ne mâsi.”

²⁰Kondo tini kaŋa-kaŋa uru ikeno lâ mbaliŋa warika ne luma ilo. Pinde muŋga siveta lâ mira kulu njalae “gol” wa “silva” wa, aŋga pinde siveta lâ kâi wa tâno wa. Pinde nde njana wurâta ara kâ, aŋga pinde nde njana

wurâta kaa nâ. ²¹Aku mine nâ, ambo tamâta tonje ma ipile vetâŋa wa ŋgua potomule ŋinde, ande i ma ipâŋga ilo mbâra-mbâra ndo lâ Maro Kindeni nao. Ŋineŋga i ma imo itogo kondo ŋinde siveta ŋana wurâta arando, aku ma imo Maro Kindeni ne wurâta tamâta mao. Aku i ma ikura tu iveta wurâta ara ndia Maro Ŋjalae ipatea papa.

²²Mine kala ikura zo rârâni noko ma kupu muli pa ilo-kalo potomule rârâni uru ipâŋga lâ tamâta limoa ilonzi kalonzi. Aku kumandi kaika ŋana kuveta vetâŋa sondo nâ lâ Maro Kindeni nao. Noko ma kuo ne kalo-tawana ilâ mao papa i, aku tini mwasa ndo panzi tini pinde wa kumo kunzi tava wisi pisi wa. Aku noko ma kuveta vetâŋa arara ŋinde rârâni, ikura Yesu Kirisi ne kalo-tawana tamâta mao uru siveta mine.

²³Ara ŋana noko ma kupu muli panzi tamâta uru siporo ŋgua potomule wa ŋgua kapa-kapa ŋinde. Noko kusama tu ŋgua kaŋa mine uru ivetanzi tamâta ilonzi sakamao kala sipawa ŋgua wa sipambita wa. ²⁴Aŋga Maro Ŋjalae ne wurâta tamâta mao nde uru ipawa ŋgua kunzi tini pinde, ande tia ndo. I uru iveta vetâŋa kie ara nâ panzi, aku ikura tu ipanananzi ŋana Maro Kindeni ne ilo-kalo ara kê tona. Ambo tamâta pinde taŋanzi kaika papa i, ande ipatawa tamwata ne wisi-nâna ndue. ²⁵Ambo tamâta pinde taŋanzi kaika ku silelea i ne ŋgua, ande i uru ikai wurâta mwasa-mwasa nâ ŋana ipanananzi sondo kê. Iveta mine ŋana duvi ŋine; i ilo ŋjalae tu Maro Kindeni ma ivilanzi ŋana sipalele ilonzi kalonzi ku sisama sondo ŋana ŋgua mao kê. ²⁶Sadana muŋga ikainzi tamâta mine kaika lâ i ne nimbu ilo, aku ivetanzi tu soka i tamwata nâ ne ŋgua muli. Andeta naŋa asama mine; ambo kinzi ma sipanâna sondo ŋana ŋgua mao kê, ande nenzi kalo-ŋgere ma ipâŋga ku ma sipile Sadana ne nimbu, kala ma simo ara.

**Lâ zo laiti ŋana tâno ne zo marumbu kê, ande kinzi
tamâta ma siveta vetâŋa sakamao kie-kie**

3 ¹Andeta noko ma kalo ŋgere ŋana ŋine kê: lâ zo laiti ŋana tâno ne zo marumbu kê, ande vetâŋa sakamao ndo ma ipâŋga. ²Kinzi tamâta ma tininzi mwasa pa warakanzi nâ, aku ma ilonzi ndo tu sikai mbaliŋa nâ. Kinzi ma sipasuka warakanzi ŋanzi kêki, ku ma siporo lâ warakanzi ilonzi tu, “Naŋa nâ”. Kinzi ma sipawa ŋgua wa siporo ŋgua potomule panzi tamâta pinde wa. Kinzi ma sivaligi tinanzi tamanzi nenzi ŋgua, ku ma sipile mâsi ŋana kawanzi ndaŋge panzi tamâta ŋinde muŋga siveta kenzi ara panzi. Kinzi ma sipu mulinzi pa Maro Kindeni ne ilo-kalo ara. ³Kinzi ma kalonzi sukâŋa ŋananzi tamâta kê, ande tia. Aku lâ zo ŋana wisinzi nâna kê, ande kinzi ma ilonzi tu silulu wisi-nâna ŋinde, ande tia. Kinzi ma situ tamâta ŋguananzi, ku ma sipakatona warakanzi ilonzi kalonzi tia. Kinzi ma sipara wa siyaulanzi tamâta pinde potomule wa. Kinzi ma sikai kazâŋa pa vetâŋa ara rârâni. ⁴Kinzi ma sipa ŋgua

kunzi tamâta, ñinenğa ma sipu ڡgua pâņa ڡinde ututu. Kinzi ilonzi kalonzi ma ipâņa ara tia ndo. Mine kala kinzi ma siveta vetâņa soki kie-kie walele nâ. Kinzi ma ilonzi ڡana warakanzi tu, “Naņa nde tamâta ڡalae.” Kinzi ma ilonzi ndo ڡana vetâņa kie-kie kaa nâ ڡana tâno ڡine ne ndekâņa kâ, aku ma ilonzi papa Maro Kindeni, ande tia. ⁵Kinzi ma siporo lâ kawanzi nâ tu kalonzi tawana Yesu Kirisi, aņa nenzi vetâņa ma itula kilalanzi pwataki tu kinzi sipu mulinzi pa i ne walo. Noko ma kumo malawae ndo ڡananzi tamâta mine.

⁶Kinzi tamâta mine uru siroto nzâla ڡana silâ taine pinde nenzi luma ilo, kinzi taine ڡinde ilonzi kalonzi ipâņa tia. Kinzi ilonzi tu taine ڡinde ma sipono muli pa nenzi ڡgua. Kinzi taine mine nde uru siveta kiesaka, aku ڡinde iveta malia panzi. Aku ilonzi uru igagatinzi ڡana siveta vetâņa potomule kie-kie tona. ⁷Kinzi taine mine uru ilonzi ڡalae tu sipanâna ڡana ڡgua kâ, andeta sikura tu soka ڡgua mao muli, ande tia. ⁸Nia ndoyo, Janes ku Jambres rua sikai kazâņa pa timbunda Mose. Aku mine nâ, lâ zo ڡine, kinzi tamâta ڡinde sikai kazâņa pa ڡgua mao, kala uru siveta vetâņa potomule ڡinde. Kinzi ilonzi kalonzi nde kapa ndo, aku nenzi kalo-tawana nde laņeņa ndo. ⁹Andeta nenzi vetâņa ڡinde ikura tu ipâņa ڡalae tia, ڡana tu tamâta rârâni ma simora nenzi vetâņa tu kapa, itogo nia ndoyo kinzi tamâta simora Janes ku Jambres rua nenzi vetâņa tu kapa mine.

Paulo itu ڡgua pa Timoti tu ma ipaveta kuku Maro Kindeni ne ڡgua

¹⁰Andeta noko muņa kumo ku naņa, kala kusama nanenğu mâsi ڡana apanananzi tamâta ڡana vetâņa rârâni Maro Kindeni ilo papa ڡinde. Noko kusama vetâņa rârâni naņa uru apaveta kuku, aku kusama nanenğu ilo-kalo rârâni marumbu lâ. Noko kusama mine: naņa kalonğu tawana Maro Kindeni mao nâ; naņa uru wisinğu nâna walele tia; naņa tiningu mwasa nâ panzi tamâta; aku naņa uru amandi kaika ڡana akale malia kâ. ¹¹Noko kusama vetâņa sakamao rârâni ڡinde tamâta pinde muņa siveta pana. Aku kusama nâna rârâni muņa akai lâ Antiok lawea wa Aikoniam lawea wa Listra lawea wa. Noko kusama vetâņa sakamao ndo siveta pa naņa lâ lawea ڡinde. Andeta Maro ڡalae ikai naņa piti lâ kazâņa ڡinde rârâni ilo, kala amo ara nâ. ¹²Mao nâ, tamâta ea ilonzi tu sipaipa kuku Yesu Kirisi ku siveta vetâņa ara lâ Maro Kindeni nao, ande tamâta ڡinde ma sikai malia wa nâna ڡana nenzi kalo-tawana kâ. ¹³Aņa kinzi tamâta sakamao sitavanzi laņeņa tamwatanzi ma sikai laņeņa panzi tamâta, aku ma sikai laņeņa pa warakanzi tona. Mine kala nenzi vetâņa sakamao ma ipâņa ڡalae. ¹⁴Aņa noko muņa kupanâna sondo ڡana ڡgua mao kâ, aku noko kalo tawana ڡgua ڡine kaika lâ. Noko kusama ne pananâņa tamâta kilalanzi pwataki tu kinzi nde tamâta ara ndo. Mine nde noko ma kumandi kaika ڡana ڡgua mao ڡinde kâ ku kumo nâ. ¹⁵Aku

noko kusama tu lâ zo ñinde noko kumo lâlu kiri-mwata yo, ande noko uru kupono muli pa Maro Kindeni ne ñgua ikeno lâ pepa tini. Ñgua ñinde ikura tu iveta noko ilo kalo sondo ndo, aku ikura tu igagati noko ne kalo-tawana ilâ pa Yesu Kirisi kâ. Aku ñana noko ne kalo-tawana ñinde kâ, ande Maro Kindeni iyauteno piti lâ kondoma ilo. ¹⁶Maro Kindeni kawa ñgua rârâni ikeno lâ pepa tini, ande ñinde i tamwata ne Koroani Sapâña muñga itula pwataki. Aku ñgua ñinde rârâni nde ara ndo ñana ipanana kindâ ñana ñgua mao kâ wa, itula nenda kiesaka pwataki wa, iveta ilonda kalonda sondo kilo wa, ipanana kindâ ñana taveta vetâña sondo lâ Maro Kindeni nao wa. ¹⁷Mine kala Maro Kindeni kawa ñgua ñinde uru iveta i ne wurâta tamâta kindâ tu tamo sondo ndo, aku takura ñana taveta vetâña arara rârâni.

**Paulo itu ñgua pa Timoti tu ma imandi kaika
ñana itula Maro Kindeni ne ñgua kâ**

4 ¹Lâ zo muli, Yesu Kirisi ma ipare nia panzi tamâta rârâni ñana nenzi vetâña kâ. I ma ipare nia mine panzi tamâta simo vianzi, aku ma ipare nia panzi tamâta muñga simâte tona. Lâ zo ñana Yesu Kirisi ma ipatua panzi tamâta rârâni, ande i ma ikai Koipu Ñjalae ku imo nâ. Kala ñine lâ Maro Kindeni nao, aña lâ Yesu Kirisi nao, naña atu ñgua kulu ñine pano: ²Noko ma kumandi kaika ñana kutula i kawa ñgua kâ. Ambo tamâta ma sindeka ñana siloño noko ne ñgua tâku sindeka tia tâku, ande kalo loko. Ikura zo rârâni, noko ma kuveta wurâta mine: kuporo ñgua ñana kuveta tamâta ilonzi kalonzi sondo wa, kutula nenzi kiesaka pwataki wa, kupu tini kaika panzi wa. Noko ma nao mwasa nâ panzi, aku kupanananzi sondo ndo ñana vetâña rârâni ñinde Maro Kindeni ilo papa. ³Ñana tu muli ñga, tamâta ma tininzi pwâka ñana siloño ñgua sondo kâ. Kinzi ma sindeka ñana siloño ñgua lañeña kie-kie, ku ma siroto ñananzi pananâña tamâta rârâ tu ma sipanananzi ñana ñgua ndia ilonzi tu siloño ñinde. ⁴Mine kala kinzi ma sipu mulinzi pa ñgua mao, aku ma sipaloño pa ñgua usi kie-kie kaa nâ. ⁵Aña noko ma kuveta mine ndimo. Noko ma kupakatona tamwata ilo kalo sondo ikura zo rârâni. Noko ma pwai malia wa nâna wa, aku pwai wurâta ñana kutula pâri ara panzi tamâta kâ. Noko nde Maro Kindeni ne wurâta tamâta; mine nde ara ñana noko ma kumo kuveta wurâta ñinde rârâni.

Paulo ne zo laiti ñana imâte kâ

⁶Timoti, noko kulonjo ñga: ñine zo laiti ñana naña ma amâte kâ, aku seenju ma irere ndue, itogo waini uru sipatarâwa pa Maro Kindeni mine. Nanenju zo ñana apile tâno ñine kâ nde imâ ipânja laiti lâ. ⁷Naña muñga apalilu apopole kaika ñana akai via mao kâ, kala ñine apânja lâ kerî. Aku naña amo apono muli pa Maro Kindeni ne ilo-kalo rârâni. ⁸Mine kala Maro Kindeni iluku lâ

ņana kulu ilua naņa kâ, itogo tamâta ņana sipopole kâ nenzi koa mine. Kulu ņinde nde mine: Maro ņjalae ma imorana tu naņa amo ilonĝu mbâra-mbâra. Maro ņjalae uru ilea sondo pa tamâta nenzi vetâņa, aku lâ zo ņjalae ņana i ma ipare nia panzi tamâta kâ, ande nanenĝu kulu ņinde ma ilua naņa. Andeta kulu ņinde ma ilua naņa simbonĝu nâ, ande tia. I ma kulu ņinde ilanzi tamâta rârâni uru ilonzi ndo keno pa i ku sio tininzi sindamwa i ņana itaulo imâ kilo kâ.

Paulo ilo tu Timoti ma imâ walele nâ

⁹Noko ma pwisi kaika ņana kumâ walele nâ pana, ¹⁰ņana tu Demas nde ipilena ku ilâ lâ. I ilo ņjalae koņa ņana tâno ņine ne kelekele, kala ilâ pa Tesalonaika lawea. Aņa Kresens nde ilâ pa Galesia tâno lâ, aņa Titi nde ilâ pa Dalmesia tâno lâ. ¹¹Luka simbo mai nâ nde imo kuku naņa yo. Mine nde ara ņana noko ma pwai Malaka iyoka kuno, aku miki rua kamâ kuku naņa. Malaka nde tamâta ara ņana ivila naņa ņana wurâta kâ. ¹²Naņa ao Tikikus ilâ pa Efesus lawea lâ. ¹³Lâ zo ņana noko ma kumâ, ande ara ņana noko ma pwai nanenĝu pasawaņa luandondo ņinde muņa apile keno Kapas ne luma lâ Troas lawea. Aku pwai nanenĝu pepa tona. Noko ma kalo ņĝere sondo, aku kalo kapa ņana pepa ņinde ndimo. Naņa ilonĝu ņjalae pa pepa ņinde muņa siveta lâ “lama” karae.

¹⁴Arisande, ina tamâta ņana iveta kelekele lâ “aini” kâ, ande muņa iveta kie soki ndo pa naņa. Muli ņga, Maro ņjalae ma nâna ilua i, ku ma ipare nia papa ņana vetâņa sakamao ņinde muņa iveta pa naņa. ¹⁵Ara ņana noko kala ma kupakatona sondo ņana tamâta ņinde. I muņa ikai kazâņa ņjalae pa nanenĝu ņgua.

¹⁶Muņa, lâ zo ņinde naņa amandi wasaseki lâ ņgua nia, ande tamâta tonĝe imo kuna ņana isuka nanenĝu ņgua kâ, ande tia. Tamâta rârâni nde sipile naņa marumbu lâ. Taitu naņa ilonĝu tu Maro Kindeni ma izavaru nenzi soki ņinde piti lâ tininzi. ¹⁷Andeta lâ zo ņinde, Maro ņjalae tamwata imo ku naņa ku isukana lâ. I walo ilua naņa, ande kala akura ndo ņana atula pâri ara kâ. Mine kala tamâta rârâni lâ tinikoa ņgu nde siloņo lâ. Aku Maro Kindeni iyaute naņa piti lâ kazâņa tamâta mbaunzi ilo. ¹⁸Aku mine nâ, Maro ņjalae ma iyautena piti lâ vetâņa sakamao rârâni kinzi ilonzi tu siveta pa naņa, ku ma io naņa alâ amo samba lawea, lawea ņinde i uru ikai maro papa. Nenda paneâņa ilâ pa i ikura zo zo. Mao.

¹⁹Ara ņana noko ma kuporo nanenĝu kari ara ilâ panzi Prisila ku Akwila rua, aku ilâ panzi tamâta ņinde simo Onesiforus ne luma tona mine nâ. ²⁰Erastus nde imo Korin lawea yo. Aņa Trofimus nde ikai pukoņa, kala apile imo Miletus lawea. ²¹Noko ma pwisi kaika ku kumâ walele nâ. Ambo noko ma kumo sonĝo, ande pisi ne zo ma imâ ipâņa. Yubulus, aņa Pudens, aņa Linus, aņa Klodia, sitavanzi kalo-tawana tamâta rârâni, ande nenzi kari ara imâ pano.

²²Maro ņjalae imo kuno, aku i ne wisi-wisi ma imo kuku miki rârâni mine nâ.